

五經同卷

佛說妙吉祥菩薩所問大乘法螺經

其七

佛說四品法門經

佛說八大菩薩經

佛說施一切無畏陀羅尼經

其七

聖八千頌般若波羅蜜多一百八名真實

圓義陀羅尼經

佛說妙吉祥菩薩所問大乘法螺經

宋西天三藏朝獻大夫試光祿卿明教大師法賢奉詔譯

如是我聞一時佛在舍衛國普徧殿內坐寶師子之座與大苾芻衆萬二千五百人俱復有菩薩摩訶薩及百千緣熟所度之衆爾時妙吉祥菩薩摩訶薩承佛威神即從座起徧袒右肩右膝著地合掌頂禮而白佛言世尊有大福德云何校量如是大福有無量俱胝那由他百千之數緣熟所度之衆意願欲滿云何如來爲彼法螺爾時世尊聞是語已告

妙吉祥菩薩言妙吉祥不可思議行大智慧
大慈大悲是大福德如是大福令一切聲聞
緣覺發大方便精進持戒願行成就得最上
三摩地觀想一切緣熟所度之衆即是如來
法螺佛告妙吉祥菩薩所有南閻浮提一切
衆生持十善法所獲福德如是校量於彼福
德積成百倍是即一金輪王福德而彼輪王
統四大洲七寶具足所謂輪寶象寶馬寶摩
尼寶玉女寶主藏寶兵寶復有千子勇猛威
德色相端嚴能破他軍妙吉祥彼金輪王有

如是大威力復次妙吉祥菩薩四大洲界所
有一切衆生如是一一衆生各等一金輪王
福德於彼衆生所有福德如是校量乃至千
倍是即一帝釋天主福德如是帝釋有大威
神福德之力復次妙吉祥菩薩四大洲界所
有一切衆生如是一一衆生各等一帝釋福
德於彼衆生所有福德如是校量百千倍數
是即一大力那羅延天福德如是那羅延天
有大威神福德力故復次妙吉祥菩薩四大
洲界所有一切衆生如是一一衆生各等一

大力那羅延天福德復於彼衆生所有福德如是校量無數百千倍是即一欲界他化自在天魔王福德如是魔王宿種善根生彼欲天有大威力而能調伏諸天人故復次妙吉祥菩薩四大洲界所有一切衆生如是一一衆生各等一魔王福德於彼衆生所有福德如是校量無量百千倍是即一二千世界梵天福德而彼梵天於二千世界行慈悲化故復次妙吉祥菩薩於二千世界所有衆生如是一一衆生各等一二千世界梵天福德於彼

所有福德如是校量無數百千倍是即一三千大千世界主大自在天及梵天福德彼大自在天及梵王於三千大千世界行慈悲化故佛告妙吉祥菩薩汝應見此劫壞之時大火所燒經一劫中爾時大自在天及梵天王降澍大雨其水徧滿三千大千世界上至梵天而此大水即是大自在天及梵王威力所作如是大自在天及彼梵王種大善根得生彼天具智慧有大威力復次妙吉祥菩薩所有三千大千世界一切衆生如是一一衆生

第七

三

各等一三千大千世界大自在天及梵王福德於彼衆生所有福德如是校量無數百千俱胝倍是即一大精進緣覺福德妙吉祥勿謂三千大千世界一切衆生皆如大梵王福德等彼緣覺而以為多假使十方佛刹一切衆生所有福德等一精進緣覺猶未為多復次妙吉祥菩薩於彼十方佛刹一切衆生所有福德如是一一衆生各等緣覺福德於彼衆生所有福德如是校量無數百千俱胝那由他倍是即一初發心菩薩福德妙吉祥勿

謂無數百千俱胝那由他倍一切衆生福德等一初發心菩薩福德而以為多假使十方盡虛空界所有卵生胎生濕生化生有色無色有想無想非有想非無想如是一切衆生所有福德無數百千俱胝那由他倍等一初發心菩薩亦未為多復次妙吉祥菩薩如是盡虛空界一切衆生各等初發心菩薩福德如是校量無數百千俱胝那由他倍是即如來一毛孔量福德諸佛如來身中毛孔量福德諸佛如來身中毛孔各各復有九十九千

細妙毛孔妙吉祥如是佛身一切毛孔所有
福德而以校量無數百千俱胝那由他倍是
即如來身分之中一種好福德如是佛身八
十種好各各具足如前復次妙吉祥菩薩如
來八十種好所有福德而以校量無數百千
俱胝那由他倍是即如來手足之下相文福
德之量如是各各相文皆有八十種好顯現
手足之下頌曰

斯七

四

傘蓋幢吉祥 鬘鈎冠寶杖 寶瓶象馬虎
金翅摩竭魚 龜魚及孔雀 迦陵頻伽鳥

命命佐沙鳥	拶俱羅鴛鴦	鸚鵡鵝鳩麥
大藥提努牛	殺羊龍牛王	寶山吉祥果
播那波鹿王	摩尼寶利劍	金剛杵弓旗
三叉犁鉞斧	擣杵箭冒索	虞拏與彌伽
梵天帝釋主	持國天水天	廣目多聞天
大仙吉祥日	火天月風天	蓮花萬字相
莎悉帝迦好	訥哩縛賢座	鏡拂憍尸迦
童子童女天	鼓螺密哩誡	手釧及鈴鐸
耳環與指環	軍拏羅羅多	妙花王樹王
衆中釋師子	如是等八十	一一俱名好

出現手足下

佛告妙吉祥菩薩所有如是八十種好一切福德如是校量無數百千俱胝那由他倍是即如來身分之中一大丈夫相福德如是佛身三十二大丈夫相一一各有如前福德於

斯十

五

佛身中分明出現頌曰

烏瑟膩沙相 螺髻髮紺青 滋潤而右旋
額廣而平正 眉間白毫光 皮膚妙柔軟
目廣青蓮葉 齒密而齊整 四十悉具足
四牙俱鋒利 白類如珂雪 腮臉并育臆

上半如師子 舌相而廣長 身形妙圓滿
如尼拘陀樹 身毛順右旋 臍輪淨深隱
雙股俱平正 兩脇如鹿王 二足下平滿
手足俱柔軟 十指而纖長 俱有網鞞相
行步而直進 舌常得上味 善相屬著身
七處皆平滿 足下而平正 常現千輻輪
如是大丈夫 三十二種相
佛告妙吉祥菩薩如是三十二大丈夫相於
此三十二相所有福德而以校量阿僧祇不
可思議不可稱量無等等不可說不可說倍

數爲緣熟度衆所願圓滿福德是故如來說
因緣成熟所度之衆而爲法螺佛告妙吉祥
菩薩所有如來妙法螺音無量無邊阿僧祇
世界一切衆生悉待普聞妙吉祥菩薩非唯
螺音如是如來身光亦能照曜無量無邊阿
僧祇世界令諸有情得見佛身如是不可思
議佛告妙吉祥菩薩大智慧大慈悲是大福
德一切聲聞緣覺善解願力行大方便清淨
持戒得最上三摩地復次妙吉祥菩薩佛身
無爲離諸相故一切聲聞緣覺及諸菩薩不

能見故如來所化色身有二種義故一者酬
於因中度生願故二者所度有情今緣熟故
是以如來化現色身所現之身清淨微妙令
諸衆生親近供養得大利益復次妙吉祥菩
薩佛身最上故相好最上相好最上故光明
最上光明最上故梵音最上梵音最上故說
法最上說法最上故佛行最上佛行最上故
如來所現色身令彼有情得大利益復次妙
吉祥菩薩如來身中具攝一切諸相隨諸衆
生根欲性等利鈍不同所現色身各各有異

令諸衆生各得親近樂聞妙法皆得度脫乃至行住之時常得見佛佛告妙吉祥菩薩如來具足應供正等正覺出現世間慈愍有情利益安樂無量人天諸衆生故爾時妙吉祥菩薩摩訶薩從座而起偏袒右肩右膝著地合掌向佛頂禮世尊而白佛言我今快得善利如是世尊三界無著最尊最勝利益一切衆生佛觀一切世法不動如須彌無著於虛空不可思不可議非見非不見爾時世尊說此經已妙吉祥菩薩摩訶薩及諸苾芻并諸

菩薩摩訶薩一切天人阿蘇羅嚧達哩縛等聞佛所說皆大歡喜信受奉行

佛說妙吉祥菩薩所問大乘法螺經

佛說四品法門經

宋西天三藏朝奉大夫試光祿卿明教大師法賢奉詔譯

如是我聞一時佛在舍衛國祇樹給孤獨園與大衆俱爾時尊者阿難獨止靜室心生是念世間有情所有驚怖乃至災害障難疾病